



Riješeno ubistvo nakon 27 godina

Pomoću DNK tragova otkriveno da je Benan Dorić 1990. godine ubio i opljačkao homoseksualca u SR Njemačkoj

SIPA je policijskim organima SR Njemačke ustupila podatke o identitetu osobe koja je davne 1990. godine počinila ubistvo na području SR Njemačke. Nakon izvršenih provjera u SR Njemačkoj, potvrđeno je da se radi o Benanu Doriću, koji se 2014. objesio.

Homoseksualac

Preduzimajući mjere i radnje na dokumentiranju krivičnih djela koja se istražuju u okviru predmeta kodnog naziva Lutka, **SIPA** je ustupila policijskim organima SR Njemačke podatke o identitetu osobe koja je počinila ubistvo. Navedeno krivično djelo počinjeno je 1990. godine na području SR Njemačke, a nakon provjera u Njemačkoj, potvrđen je identitet počinioca krivičnog djela i tako je rasvijetljeno ubistvo počinjeno prije 27 godina.

Dorić je bio predmet rada **SIPA** u okviru predmeta Lutka, te se tako došlo do bitnih informacija u vezi s ubistvom 48-godišnjeg trgovca Eberharda K. iz Unterhachinga, predgrada Münchena.

Istragom se došlo do podataka ko je u junu 1990. godine u jednom stanu u predgrađu Münchena usmrtio 48-godišnjeg trgovca, tako što ga je zadavio električnim kablom i više puta izbo nožem, a potom opljačkao.

Tijelo Eberharda K. pronađeno je 18. juna 1990, 10-15 dana nakon ubistva. Policiji je tada bilo poznato samo da je Eberhard K. koristio homoseksualne kontakte poslije njegovog razvoda. Bio je osumnjičen njegov tadašnji partner, ali ispostavilo



Ubijeni Eberhard K. i Benan Dorić



se da je imao alibi, te je policija došla u čorsokak s istragom. Razvojem metoda izdvajanja i analize DNK profila iz bioloških tragova, omogućeno je uspješno otkrivanje zločina na osnovu otkrivanja DNK profila. Tako je 2006. godine otkriven DNK profil ubice Eberharda K, ali u datotekama njemačke policije nije bilo profila koji bi odgovarao ubici iz Unterhachinga.

Poziv kolegama

Potom je njemačka policija izdvojeni DNK profil ubice 48-godišnjeg trgovca iz Unterhachinga, kao i otiske prstiju, stavila u evropsku bazu podataka, te su pripadnici **SIPA** uočili da se taj DNK profil i otisci prstiju poklapaju sa Dorićevim. Odmah su obavijestili kolege u Njemačkoj da je Eberharda K. iz Unterhachinga ubio Dorić, koji je u to vrijeme imao 21 godinu.

Podsjetimo, Dorić se u martu 2014. prvo pokušao ubiti eksplozijom gasa u svojoj kući, ali su tada povrijeđene njegova supruga i majka, a potom se objesio u bašti.

DRAGAN PAVLOVIĆ

Benan Dorić je 24. novembra 2010.

godine u sarajevskoj Ulici Betanija pucao na Envera Suljagića, predsjednika Udruženja Sarajevotaksi



Stan u kojem je pronađeno tijelo trgovca u Unterhachingu, kod Münchena